

Roly Bislick

E biaha aki redaccion di Revista WARERO tabata activo den e bario di Savaneta, na cas di Sr. Roly Bislick kende ta un conocido deportista di nos comunidad y tambe entrenador, y maestro di school. Roly a concede e Revista WARERO cu e relato aki, basa ariba su estudio y tambe enparticular ariba e club di natacion Aruba Dolphins di cual e ta entrenador actualmente.

Roly a studia 5 aña na Hulanda, di cual e prome dos aña y mei e a studia pa sportleider na C.I.O.'s Overveen, y mei aña e a specialisa su mes den Basketball y landamento, y dos aña e a sigui pa su akte L.O y alaves e a traha dos aña y mei pa C.I.O.S. como Internaatleider cual a dune e oportunidad pa practica mas sport.



Actualmente Roly ta trahando na Martin Luther King School na Congoweg como Sportleraar, aki nan ariba recomendacion di e hoofd di school e a cuminsa cu un team di landamento di school pero mirando cu despues cu e mucha nan caba school nan no ta sigui practica e deporte aki, e a dicidi di lanta un club di natacion na Savaneta cual ta hiba e nomber actualmente di Aruba Dolphins, y cual ta consisti awor caba di mas of menos 60 miembros. E club aki no ta solamente pa hoben nan di Savaneta so, pero hoben nan di otro distrito tambe por inscribi como miembro, e unico problema cu tin ta e problema di transportacion pa e hoben nan di e otro distrito nan, debi cu e club aki tin su regla na cual ta exige hopi disciplina. Aruba Dolphins ta practica por lo menos 4 a 5 bes pa siman practicando un hora y mei pa dia di cual ningun dia por worde falta. Pa e muchanan cu ta biba pafor di Savaneta e punto mas dificil lo ta transportacion cual ta trece cu ne hopi biaha nan ta jega laat, of keda sin presenta.

Training ta tur atardi entre 4:45 pa 6:30, actualmente tin algun hoben di Rooi Koochi cu ta bario basta leeuw for di Savaneta y cu ta acudi na tur e training nan y esey ta un punto masha principal di mes e muchanan ta crea un caracter positivo y un mentalidad y disciplina no solamente pa deporte, pero den e completo generacion. Financieramente e gastonan ta worde cubri door di contribucion di e miembro nan cual ta fl 2.00 pa luna, tambe e club ta haya un entrada cu sambujamento di cuminda di lama e.o. kreeft, carco, y pisca, cu ta worde bendi cu e habitante nan di Savaneta mes. Training nan di Aruba Dolphins ta worde teni den lagoen na Savaneta, y tambe den un di e piscina nan di un di e hotel nan na beach cual ta tur diabierna atardi.

E piscina aki ta worde usa gratis, pero si, mester tene cuenta cu ora ta season di turista, nan tin preferencia ariba e piscina, y tambe tin mas club cu ta haci uso di e piscina aki.

Aña pasa Aruba Dolphins a tene un competencia di landamento di 2 kilometer cual tabata na Augustus '76 saliendo for di Cura Cabay, y e aña aki lo e worde teni den luna di September, y for di awor aki Roly ta invita tur e landador nan di Cura Cabay y Brazil pa tuma parti na e competencia aki, y e biaha aki lo tin ademas di e trofeo nan, premio especial pa tur esnan cu yega e finish line. Pa mehoracion di e deporte di natacion aki na Aruba segun Roly ta falta di un zwembard cu exigencianan internacional, di cual tin plan tocante esaki pero pa banda di gobierno tin un tardanza.

Un di e punto nan cardinal ta cu gobierno mester a cuminsa mescos cu na Curacao, na unda les di landamento ta worde duna na schoolnan como lichamelijke opvoeding.

Pa sigui ariba e tema di zwembard, esey ta plania

pa bini na Congoweg pero ki tempo ki aña esey tempo lo dicidi, manera tin un proverbio ta bisa na Hulandes (wij zitten om te springen) y un zwembad ta algo di urgencia pa yuda stimula e deporte aki, cu un zwembard tur e schoolnan di Aruba por haya les segun e raport di Sr. van Hastel kende ta adviseur di Sport Bureau di gobierno kende a worde busca for di Hulanda. Cu un zwembad asina por bin tambe ademas di landamento diferente sport nan aguatico.

E actividadnan di Aruba Dolphins ta ensera cu nan a yega di participa na diferente competencia nan local y tambe competencianan Antillano y e Club di Aruba Dolphins tin un total di 44 medalias gana, y tambe tin un hoben di 13 aña cu lo bay participa e aña aki na luna di Augustus na Miami Springs den un torneo internacional cual ta e hoben Tico Henriquez.

Aparte di landamento Roly ta practicando baseball formando parti di e equipo di Arusino como pitcher, y segun Roly su declaracion, Arusino tin hopi chens di bira campeon e aña aki.

Segun Roly a declara cu ta di aprecia e bario nan manera Centro di Bario Noord y Dakota cu nan a yega asina leeuw di tin nan propio centro di bario, y tambe ta di aprecia cu Brasil tambe ta den e mes un direccion ey, y cu tur distrito aki na Aruba mes-ter tin nan propio centro di bario, importante ta pa logra algo no cumenza na otro pero cumenza cu bo mes.

Plan nan di Roly pa futuro ta, di bay sigui studia na Hulanda dos aña y mei pa caba su M.O. y mas specialisatie y si tin chens sigui pa ambtenaar sport en jeugdzaken.

Rolly tabata masha agradecido cu Revista WARERO a bishite na su cas, na unda gustosamente e a tuma su tempo pa dedica e relato aki na nos redaccion.

Den number di Revista WARERO nos kier a desea Roly hopi exito den futuro, y alaves gradicie pa su cooperacion.....



Esaki ta algun di e alumuonan di Roly (Aruba Dolphins).